

2/11/2021 m/s: 7 84

Industri perikanan negara terbela

LKIM pandu kemajuan golongan nelayan, naik taraf ekonomi

Oleh MUHAMMAD AMNAN HIBRAHIM

Penubuhan Lembaga Kemajuan Ikan Malaysia (LKIM) sejak 50 tahun lalu merupakan sejarah penting dalam memandu kemajuan industri perikanan negara.

Menteri Pertanian dan Industri Makanan, Datuk Seri Dr Ronald Khandee berkata, sepanjang tempoh tersebut, LKIM menjadi pemangkin kepada usaha peningkatan produktiviti dan taraf hidup serta kedudukan sosioekonomi nelayan di seluruh negara.

Menurutnya, walaupun berdepan pelbagai cabaran sejak penubuhannya pada 1 November 1971, LKIM telah memperlihatkan agensi ini berusaha keras dalam meningkatkan pendapatan nelayan dan menjaga kesejahteraan golongan ini, sekali gus memajukan sektor perikanan negara secara keseluruhannya.

“Kejayaan LKIM berkait rapat dan telah banyak membantu menaikkan taraf hidup dan sumber ekonomi nelayan dari semasa ke semasa menerusi pelbagai program dan inisiatif.

“Usaha itu merangkumi langkah meningkatkan produktiviti tangkapan hasil laut dan mempelbagaikan sumber pendapatan nelayan dan keluarga nelayan melalui pelbagai bidang di keseluruhan rantai perikanan termasuk aktiviti agropelancongan, akuakultur, pemprosesan, perdagangan serta industri hiliran,” katanya.

Beliau berkata demikian ketika berucap pada majlis ‘Sambutan Jubli Emas 50 Tahun LKIM Menghargai Nelayan’ yang diadakan di Dewan Besar LKIM di sini pada Isnin.

Turut hadir, Timbalan Menteri Pertanian dan Industri Makanan I, Datuk Seri Ahmad Hamzah; Timbalan Menteri Pertanian dan Industri Makanan II, Dr Nik Muhammad Zawawi Salle; Pengerusi LKIM Datuk Syed Abu Hussin Hafiz Syed Abdul Fasal.

Hadir sama, Ketua Setiausaha



Ronald Khandee (tengah) bersama Yusoff (kanan) melihat replika bot nelayan selepas pelancaran sempena sambutan Jubli Emas 50 Tahun LKIM.

Kementerian Pertanian dan Industri Makanan (MAFI), Datuk Haslina Abdul Hamid; Ketua Pengarah LKIM, Yusoff Othman dan Pengerusi Persatuan Nelayan Kebangsaan (Nekmat), Abdul Hamid Bahari.

Beliau berkata, bagi tahun 2021 MAFI melalui LKIM telah memperuntukkan sebanyak RM6.43 juta untuk baik pulih rumah nelayan dan pembinaan rumah baharu kepada nelayan di seluruh negara di bawah Projek Khas Perumahan Nelayan (PKPN).

Katanya, LKIM turut memperuntukkan lebih RM150 juta pada tahun ini bagi bantuan dan insentif kepada masyarakat nelayan seluruh negara merangkumi Elaun Sara Hidup Nelayan (ESHN), Subsidi Minyak Diesel dan Petrol, Dana Nelayan, Tabung Bencana dan Kebajikan Nelayan, Projek Tanaman Kotan, bantuan Projek Ekonomi Kumpulan Nelayan serta Program Food Basket Nelayan.

“Pada masa sama, kerajaan juga buat julung kalinya memperluaskan Skim Keselamatan Sosial Pekerjaan Sendiri (SKSPS) Perkeso, kepada golongan nelayan di bawah Akta Keselamatan Sosial Pekerjaan Sendiri 2017 yang dilaksanakan dengan kerjasama Kementerian Sumber Manusia.

“Skim ini memberi perlindungan kepada nelayan dan keluarga daripada sebarang bencana pekerjaan dan kemalangan. Setakat ini, sejumlah 35,238 orang nelayan yang juga penerima ESHN telah mencarum di bawah

SKSPS ini dengan nilai bayaran sejumlah RM5.5 juta,” ujarnya.

Ke arah DAN 2.0

Usaha pembangunan sektor perikanan juga akan terus diberi penekanan dalam Dasar Agromakanan Negara 2021-2030 (DAN 2.0).

Dalam usaha meningkatkan kemampuan sumber perikanan negara pula, DAN 2.0 telah merangka pelbagai strategi antaranya mengimbangi nisbah pendaratan ikan marin dan akuakultur dengan nisbah 60:40.

Selain itu, keupayaan pemantauan, kawalan dan pengawasan (MCS) di sekitar kawasan marin akan dipertingkatkan bagi mengekalkan biodiversiti dan ekosistem yang menjadi sumber perikanan.

Sementara itu, Yusoff berkata antara kejayaan utama LKIM sepanjang tempoh penubuhannya ialah meningkatkan pendapatan nelayan sehingga 20 ke 30 peratus berbanding berbanding 50 tahun lalu.

Katanya, LKIM menyasarkan untuk meningkatkan lagi penyertaan dan peralihan nelayan di seluruh negara kepada operasi perikanan-laut dengan menggunakan bot besar.

Bagi Abdul Hamid pula, penubuhan LKIM telah memberi satu harapan kepada nelayan negara sebelum ini hidup di bawah paras kemiskinan.

Katanya,sepanjang penubuhan 50 tahun LKIM, agensi tersebut juga sentiasa



ABDUL HAMID



ABU BAKAR



YUSOFF

meningkatkan program, bantuan dan insentif kepada nelayan di seluruh negara.

“Jika dulu nelayan negara tidak ada elaun sara hidup, tiada sumber pendapatan dan makanan jika musim tengkujuh. Tetapi dengan adanya LKIM dan keprihatinan kerajaan mereka perolehi semua itu kini.

“Kewujudan pasar-pasar nelayan dan pembinaan infrastruktur seperti jeti di seluruh negara dilihat berjaya memberi satu nilai tambah kepada pendapatan kumpulan nelayan,” ujarnya.

Sementara itu, Pengerusi Persatuan Nelayan Negeri Sembilan, Abu Bakar Dawam berkata, pemberian insentif dan kemudahan seperti subsidi minyak, sara hidup serta penyediaan perumahan amat signifikan dalam membantu nelayan di negeri tersebut yang majoritinya nelayan pesisir pantai.

“Dari segi pendapatan nelayan di Negeri Sembilan, kita tidak menggunakan pukat tunda dan pukat sorong malah kawasan perikanan di sini antara yang terkecil di dalam negara.

“Apabila tiada tangkapan, bantuan seperti itu daripada LKIM inilah yang membantu nelayan meneruskan kelangsungan hidup dan aktiviti,” ujarnya.



Ronald Khandee (kiri) bersama Syed Abu Hussin pada gimik pelancaran sempena sambutan Jubli Emas 50 Tahun LKIM yang diadakan di Dewan Besar LKIM.



Ronald Khandee melawat dan mencuba makanan di geral pameran selepas majlis pelancaran.